

## **Deset godina uspostave Visokog sudskog i tužilačkog vijeća BiH**

Ustavnopravna komisija Predstavničkog doma Parlamentarne skupštine Bosne i Hercegovine je centralno radno tijelo Parlamenta u kojem se oblikuju zakoni i razmatraju izvještaji i informacije koje se odnose na sistem sudske vlasti u Bosni i Hercegovini.

Iz ovog ugla posmatrano, možemo reći da je dosadašnja reforma sistema sudske vlasti u Bosni i Hercegovini uspješna, ali ne i dovršena. Visoko sudsko i tužilačko vijeće Bosne i Hercegovine je neovisni regulator sistema sudske vlasti i od njegove reforme ovisi reforma ukupnog sistema sudske vlasti u Bosni i Hercegovini. Cijenim da smo prije deset godina započeli na pravi način, da su ostvarena mnoga postignuća i da se mora nastaviti na tragu postojeće reforme. Strukturalni dijalog u oblasti pravosuđa, vođen od strane Evropske komisije, je ključni proces u okviru kojeg se trebaju oblikovati daljnji koraci u ovoj reformi.

Krajnji rezultat reforme mora biti sistem sudske vlasti koji je efikasan, funkcionalan i što je iznimno važno - neovisan. Daljnjim tokom reforme moraju se unapređivati postojeća rješenja. Nedopustivo je da se ovaj proces upotrijebi za destrukciju dostignutih reformi. Znano je da ima i takvih tendencija. Pozivam Vas da se tim tendencijama oduprete i da nastavite putem kojim smo krenuli. Ima puno posla kojeg treba uraditi, a Vaš ozbiljan i odgovoran rad na svim poljima Vaše djelatnosti će biti najbolji odgovor kritičarima.

Sve što se radi u okviru ove oblasti, mora biti isključivo u interesu svih građana Bosne i Hercegovine, a građani hoće društvo u kojem se efikasno ostvaruje redovan put pravne zaštite i društvo bez korupcije. Stoga treba bezkompromisno nastaviti reformu, a politikante i kočničare gurnuti na marginu događaja. Uspjeh ove reforme ovisi od svih nas koji imamo određene uloge u njenoj realizaciji. Posebno ovisi od Vas koji se nalazite u sistemu sudske vlasti. Zato uzmite sve ustavne i zakonske mehanizme u svoje ruke i nastavite dalje. Zbog toga mi je posebno drago kada god čujem glas iz Vaše branše, a u posljednje vrijeme se zaista čuju, kojim se odupire pokušajima destrukcije. Osim ovoga, nužno je da besprijekorno izvršavate Vaše obaveze i da sistem sudske vlasti u potpunosti odgovori svom zadatku. Morate pokazati odgovornost. Pozivam Vas da dobro razmotrite primjedbe građana koje je u svom govoru pomenuo i visoki predstavnik. Propisane norme se moraju ispunjavati, plaće se moraju zaraditi i na taj način graditi povjerenje građana prema Vama.

Manifestaciju u povodu desete godišnjice uspostave Visokog sudskog i tužilačkog vijeća Bosne i Hercegovine obilježavamo ovdje u centralnoj dvorani Parlamentarne skupštine Bosne i Hercegovine. U ovim klupama sjede zastupnici, predstavnici raznih političkih stranaka koji, između ostalog, imaju svoje poglede i na reformu sistema sudske vlasti u Bosni i Hercegovini. Moja vizija i pogled na ovu reformu, već sam to rekao, je da je to uspješna, ali ne i dovršena reforma. Daljnji put ove reforme vidim u nekoliko koraka. Nužno je situiranje sistema sudske vlasti u normativni dio Ustava Bosne i Hercegovine. Potrebno je izvršiti unifikaciju sudskih procesnih zakona. Mora se promijeniti sistem finansiranja pravosuđa tako što će se uspostaviti jedinstven budžet, jer fragmentirano budžetiranje koje ovisi od raznih nivoa vlasti nije saveznik principu nezavisnosti pravosuđa.

---

\* Govor predsjedavajućeg Ustavnopravne komisije Predstavničkog doma Parlamentarne skupštine Bosne i Hercegovine povodom desetogodišnjice osnivanja Visokog sudskog i tužilačkog vijeća BiH, Parlamentarna skupština BiH, 29. 05. 2014.

Danas se reforma sudske vlasti vrši u okviru strukturalnog dijaloga kojeg vodi Evropska komisija. Oni su se uključili u ovaj proces u jednom kritičnom trenutku i ja im se na tome zahvaljujem. Rezultat tog dijaloga mora biti efikasnije, funkcionalnije i potpuno neovisno pravosuđe. Ne smije rezultat ovog dijaloga biti destrukcija Visokog sudskog i tužilačkog vijeća BiH tako što bi se imenovanje tužilaca izmjestilo iz tog tijela u razne parlamente kako je to, nažalost, zagovarano sporazumima nekih političkih stranaka. Nema neovisnog pravosuđa ukoliko se tužioci budu birali u parlamentima, pa i u ovoj sali. Također ne smije rezultat strukturalnog dijaloga biti umanjenje kapaciteta pravosudnih institucija na državnom nivou. Bosni i Hercegovini je potreban Vrhovni sud i ja zagovaram njegovo osnivanje. Znam da oko toga, u ovom trenutku, nema političke saglasnosti bez koje je to nemoguće učiniti. Međutim, nedopustivo je zagovarati umanjenje nadležnosti državnog suda i formiranje apelacionog suda samo u kapacitetu postojećeg apelacionog odjela Suda Bosne i Hercegovine. Apelacioni sud mora imati šire ingerencije, jer se jedino na taj način može opravdati njegovo formiranje.